

Broj: 09-49-1-3963-8/19
Sarajevo, 10.07.2019. godine

Na osnovu člana 70. st. (1) i (3) Zakona o javnim nabavkama („Službeni glasnik BiH“, broj: 39/14), a na prijedlog Komisije za javne nabavke, imenovane Rješenjem, broj: 03-05-1-1494/19 od 13.03.2019. godine, federalna ministrica financija/finansija **d o n o s i**

ODLUKU
o izboru najpovoljnijeg ponuđača za javnu nabavku usluga -
obnova licenci za VMware vCenter i VMware vSphere
za potrebe Federalnog ministarstva financija/finansija

I

U cilju odabira najpovoljnijeg ponuđača, nakon provedenog otvorenog postupka javne nabavke usluga – obnova licenci za VMware vCenter i VMware vSphere za potrebe Federalnog ministarstva financija/finansija, evidencijski broj nabavke: 09-49-1-3963-1/19, broj obavještenja o nabavci sa portala javnih nabavki: 810-1-2-25-3-7/19 od 28.05.2019. godine, Sažetak obavještenja objavljen u „Službenom glasniku BiH – Oglasnik javne nabavke“, broj: 38/19., kao najpovoljnija ponuda ocijenjena je ponuda ponuđača:
QSS d.o.o. Sarajevo, s ukupnom cijenom ponude, nakon okončane e-aukcije, u iznosu 34.900,00 KM bez PDV-a.

II

Ponuda ponuđača iz tačke I ove odluke ocijenjena je prihvatljivom, jer ispunjava sve uvjete postavljene Tenderskom dokumentacijom, a u skladu sa kriterijem za dodjelu ugovora, ponuđač je ponudio najnižu cijenu.

III

Za realizaciju ove odluke zadužuje se Sektor za ekonomske, finansijske i zajedničke poslove ovog Ministarstva.

IV

Odluka stupa na snagu danom donošenja i objavit će se na web stranici Federalnog ministarstva financija/finansija, u skladu sa članom 70. stav (6) Zakona o javnim nabavkama, istovremeno s upućivanjem iste svim ponuđačima koji su učestvovali u predmetnom postupku javne nabavke.

O b r a z l o ž e n j e

Postupak nabavke pokrenut je Odlukom o pokretanju postupka, broj: 09-49-1-3963/19 od 24.05.2019. godine. Javna nabavka provedena je putem otvorenog postupka nabavke. Ukupna procijenjena vrijednost nabavke iznosila je 35.000,00 KM bez PDV-a i predviđena je Planom javnih nabavki za 2019. godinu Ministarstva, dio II Usluge, pod rednim brojem 2. – Obnova licenci za VMware vCenter i Vmware vSphere. Obavijest o nabavci, broj: 810-1-2-25-3-7/19 poslana je na objavu 28.05.2019. godine, te je zajedno sa Tenderskom dokumentacijom, istog dana objavljena na portalu javnih nabavki. Sažetak obavještenja objavljen u „Službenom glasniku BiH – Oglasnik javne nabavke“, broj: 38/19.

Tendersku dokumentaciju preuzelo je 19 privrednih subjekata, a 3 ponuđača dostavila su ponude u predmetnom postupku nabavke. Sve ponude su dostavljene blagovremeno. Ponude su dostavili sljedeći ponuđači: QSS d.o.o. Sarajevo, BBS d.o.o. Sarajevo i AVACOM Group d.o.o. Mostar.

Komisija za javne nabavke, imenovana Rješenjem, broj: 03-05-1-1494/19 13.03.2019. godine, izvršila je pregled i evaluaciju pristiglih ponuda, te konstatirala da su ponude ponuđača: QSS d.o.o. Sarajevo i AVACOM Group d.o.o. Mostar prihvatljive, a da je ponuda ponuđača BBS d.o.o. Sarajevo neprihvatljiva.

Ponuda ponuđača BBS d.o.o. Sarajevo, sa registriranim sjedištem u ul. Kranjčevićeva 39, Sarajevo, ID broj 4200298380009, odbačena je kao neprihvatljiva iz sljedećih razloga: U točki IV Podaci o ponudi podtočka 13. Tenderske dokumentacije propisano je da ponuda i svi dokumenti, kao i korespondencija između ponuđača i Ugovornog organa moraju biti napisani na jednom od službenih jezika u Bosni i Hercegovini, te da se pri pripremi ponuda ponuđač mora pridržavati zahtjeva iz Tenderske dokumentacije. S tim u vezi, ponuđač BBS d.o.o. Sarajevo je u svrhu dokazivanja tehničke i profesionalne sposobnosti dostavio Potvrdu MAF (Manufacturers Authorization Form) na engleskom jeziku bez prevoda na jedan od službenih jezika u upotrebi u Bosni i Hercegovini, te stoga Komisija nije prihvatila dostavljeni dokaz kao validan. Također, traženo je od ponuđača, da u svrhu dokazivanja tehničke i profesionalne sposobnosti, dostave spisak najmanje tri uredno izvršena ugovora u prethodne tri godine ili od datuma registracije, odnosno od početka poslovanja, ako je ponuđač registriran odnosno počeo s radom prije manje od tri godine, a čiji su karakter i kompleksnost slični onima koji se odnose na predmetnu nabavu, uz Potvrdu druge ugovorne strane o njihovoj uspješnoj realizaciji. U slučaju da se iz objektivnih razloga ne može dobiti takva potvrda od druge ugovorne strane, važi Izjava ponuđača o uredno izvršenim ugovorima, uz predočavanje dokaza o učinjenim pokušajima da se takve potvrde osiguraju od druge ugovorne strane. Ponuđač BBS d.o.o. Sarajevo umjesto tri dostavio je dvije Potvrde o urednom izvršenju ugovora. Uzimajući u obzir naprijed navedeno, Komisija je ponudu ponuđača BBS d.o.o. Sarajevo odbacila kao neprihvatljivu.

Za ovaj postupak, Ugovorni organ je predvidio provođenje e-aukcije, koja je okončana 05.07.2019. godine u 13.10 sati.

Nakon izvršenog pregleda i evaluacije pristiglih ponuda, Komisija je dostavila federalnoj ministrici financija/finansija Zapisnik o pregledu i ocjeni ponuda, broj: 09-49-1-3963-7/19 od 08.07.2019. godine zajedno sa Preporukom o izboru najpovoljnijeg ponuđača QSS d.o.o. Sarajevo, s registriranim sjedištem u ul. Dejzina Bikića bb, Sarajevo, ID broj: 4200103980007.

U postupku donošenja ove odluke, posebno su cijenjene činjenice, da je Komisija pravilno i potpuno, izvršila ocjenu kvalificiranosti ponuđača, te ocjenu prispjelih ponuda, shodno postavljenim uvjetima iz tenderske dokumentacije.

U postupku ocjene provedenog postupka, federalna ministrica nije našla razloge, nepravilnost niti propuste u radu, koji bi eventualno bili osnov za neprihvatanje preporuke Komisije za javne nabavke.

Naime, u postupku je ocijenjeno da je Komisija u svemu pravilno postupila, te da je izbor izvršen u skladu sa Zakonom o javnim nabavkama, podzakonskim aktima i Tenderskom dokumentacijom.

Izabrani ponuđač dostavio je prihvatljivu ponudu u skladu sa uvjetima postavljenim u Tenderskoj dokumentaciji, a u skladu sa kriterijem za dodjelu ugovora, ponuđač je ponudio najnižu cijenu.

Uzimajući u obzir naprijed navedeno, odlučeno je kao u dispozitivu ove odluke.

POUKA O PRAVNOM LIJEKU:

Protiv ove odluke, svaki ponuđač koji je učestvovao u postupku nabavke, može izjaviti žalbu Uredu za razmatranje žalbi putem Ugovornog organa - Federalnog ministarstva financija/finansija, u pisanoj formi direktno, elektronskim putem ili preporučenom poštanskom pošiljkom, u roku od 10 (deset) dana od dana prijema ove odluke. Žalba se podnosi u najmanje 3 (tri) primjerka.



Dostaviti:

1. Svim ponuđačima
2. U dokumentaciju Komisije
3. Sektoru za ekonomske, finansijske i zajedničke poslove
4. a/a